

BASES REGULADORAS DA I EDICIÓN DO PROGRAMA “DESCÚBREAS”

Na actualidade a desigualdade de oportunidades entre mulleres e homes na industria musical é unha realidade que revelan os datos relativos ao número de rapazas que cursan estudos nas escolas de música e as que se dedican profesionalmente á música tras rematar os estudos. Outra mostra desta desigualdade é a fenda de xénero existente na oferta musical; na maioría dos carteis dos festivais de música do noso país é moi habitual que as cabezas de cartel sexan bandas maioritariamente masculinas.

Consciente desta realidade, a Deputación de Pontevedra puxo en marcha un proxecto que ten como fío condutor o empoderamento das nenas e mulleres no ámbito musical e a visibilización da música de autoría feminina, amosando referentes cunha traxectoria consolidada en todos os ámbitos do sector musical: na produción, a composición ou a interpretación, entre outros.

“Descúbreas” é un programa que ten como obxectivo articular accións que axuden a compensar as dificultades coas que as mozas se atopan actualmente na escena musical, que impiden que se dediquen profesionalmente á música cando rematan os seus estudos. Cómpre rachar cos obstáculos que dificultan o desenvolvemento da súa carreira e imposibilitan que teñan as mesmas oportunidades que os seus compañeiros varóns.

O programa comprende unha serie de accións dirixidas a xerar as condicións óptimas para acadar un espazo de encontro no que se leven a cabo actividades relacionadas co protagonismo da muller na historia da industria musical, con especial fincapé na música feita por elas, nas que amosen o seu sentir en primeira persoa, as súas inquedanzas, reivindicacións ou reflexións a través da súa propia ollada. O obxectivo deste espazo é que as estudantes de música novas, ou con inquedanza musical, encontren referentes reais, coñezan artistas na súa mesma situación e poidan trasladarlles as súas consultas a artistas xa consolidadas.

A proposta ten dous fíos condutores: por unha banda, unha plataforma web, que albergará todos os contidos que conforman o programa “Descúbreas”, cun directorio, cunha axenda, con tutoriais acerca do funcionamento da industria musical e cunha consultoría en liña; por outra

banda, un programa de mentoría, que terá como resultado a gravación das súas propias cancións e do seu propio vídeo musical.

O propósito da mentoría é acompañar as rapazas nos seus primeiros pasos: contactar e familiarizarse cos procesos iniciais ata conseguir os seus primeiros contidos, unha canción, un vídeo musical, un concerto... Trátase de motivar as novas xeracións de rapazas para vencer as "barreiras invisibles" no sector musical.

Primeira. Obxecto

Constitúe o obxecto destas bases regular o procedemento de selección das oito rapazas participantes no programa de mentoría na primeira edición do programa "Descúbreas", que ten por finalidade favorecer que as rapazas da provincia de Pontevedra con inquietudes musicais adquiren coñecementos para proxectar as súas carreiras no mundo da música e incidir de forma directa na súa participación e promoción na escena musical.

Segunda. Persoas beneficiarias

É un programa de apoio e posta en marcha de propostas musicais de nenas e mozas de entre 16 e 26 anos da provincia de Pontevedra, en colaboración con profesionais do sector, escolas e produtoras.

Terceira. Bolsas

As oito participantes seleccionadas participarán nun proceso de mentoría titorizado por persoal especializado do programa "Descúbreas", cunha duración estimada de dous (2) meses, e terán acceso a:

- Un itinerario individualizado en función das características de cada alumna. Nel detallaranse as sesións de mentoría, das que se fará un seguimento pormenorizado
- A gravación dunha canción propia en estudio
- A gravación e realización dun vídeo musical propio

As bolsas teñen un valor estimado de 1.000 € cada unha.

O gasto imputarase á aplicación 21/250.2315.227.07.2020 do Orzamento provincial e está asociado ao expediente de contratación aprobado pola Resolución presidencial núm. 2020004061.

Cuarta. Presentación de solicitudes

As solicitudes presentaranse preferiblemente por vía electrónica a través do formulario normalizado dispoñible na Sede electrónica da Deputación de Pontevedra (<https://sede.depo.gal>).

Para a presentación das solicitudes a Sede electrónica admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNIE).

Opcionalmente, poderán presentarse as solicitudes presencialmente en calquera dos lugares e rexistros establecidos na normativa reguladora do procedemento administrativo común utilizando o formulario normalizado dispoñible en <https://sede.depo.gal>.

As participantes deberán presentar un vídeo dunha interpretación musical propia; garantirán que o seu contido sexa orixinal e non infrinxa dereitos de terceiras persoas, e serán responsables das infraccións que poidan causar neste sentido.

Quinta. Prazo de presentación de solicitudes

O prazo de presentación de solicitudes será de quince (15) días hábiles, contados a partir do día seguinte ao da publicación desta convocatoria no *Boletín Oficial da Provincia de Pontevedra* (BOPPO).

Sexta. Comprobación de datos

Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas solicitantes
- Certificado de residencia das persoas solicitantes

No caso de que as persoas interesadas se opoñan a estas consultas deberán indicalo no cadro habilitado no formulario de inicio e achegar os documentos correspondentes.

Excepcionalmente, no caso de que algunha circunstancia imposibilitase a obtención destes datos, poderáselles solicitar ás persoas interesadas a presentación dos documentos correspondentes.

Sétima. Documentación

As interesadas deberán achegar coa solicitude a seguinte documentación:

- Carta de motivación
- Currículo da súa carreira musical e a documentación acreditativa desta

Esta documentación presentarse preferiblemente por vía electrónica. As interesadas responsabilizaranse da veracidade dos documentos que entreguen. Excepcionalmente, a Deputación de Pontevedra poderá requirir a presentación do documento orixinal para cotexalo coa copia electrónica achegada.

Oitava. Trámites administrativos posteriores á presentación de solicitudes e as súas emendas

Todos os trámites administrativos que as interesadas deban realizar durante a tramitación deste procedemento faranse preferiblemente por medios electrónicos a través do modelo "instancia xenérica", dispoñible na Sede electrónica da Deputación de Pontevedra (<https://sede.depo.gal>).

Opcionalmente, tamén se poderán tramitar presencialmente en calquera dos lugares e rexistros establecidos na normativa reguladora do procedemento administrativo común.

Se a solicitude non reunise os datos esixidos na convocatoria ou calquera dos previstos no artigo 66 da Lei do procedemento administrativo común das administracións públicas (LPACAP) requiriráselle á persoa interesada, de conformidade co establecido no artigo 68 desta, que nun prazo de dez (10) días hábiles emende as faltas ou presente os documentos preceptivos, e indicáráselle que, se non o fai, se terá por desistida a súa solicitude, tras a resolución ditada para os efectos segundo o artigo 21 da devandita lei.

Novena. Notificacións

As notificacións de resolucións e actos administrativos practicaranse preferentemente por medios electrónicos, nos termos previstos na normativa reguladora do procedemento administrativo común.

As notificacións realizaranse a través da Carpeta Ciudadana e de Dirección Electrónica Habilitada única. Ambos os sistemas son accesibles desde <https://sede.depo.gal>.

As notificacións entenderanse practicadas no momento no que se produza o acceso ao seu contido e rexeitadas cando transcorresen dez (10) días naturais desde a posta á disposición da notificación sen que se acceda a este.

O sistema remitiralles ás persoas interesadas avisos da posta a disposición das notificacións á conta de correo electrónico indicada na solicitude. Estes avisos non terán, en ningún caso, efectos de notificación practicada e a súa falta non impedirá que a notificación se considere plenamente válida.

Se o envío da notificación electrónica non fose posible por problemas técnicos a Deputación de Pontevedra practicará a notificación polos medios previstos na normativa reguladora do procedemento administrativo común.

Décima. Criterios de selección das participantes

As persoas que se presenten á convocatoria seleccionaranse, en réxime de concorrencia competitiva, segundo a valoración de méritos, o traballo presentado e a entrevista persoal.

Unha vez recibidas as solicitudes de participación, o persoal técnico do programa “Descúbreas” contactará por teléfono coas persoas interesadas e convocaraas ao proceso de selección, no cal o xurado nomeado para tal fin realizaralles unha entrevista persoal.

Na entrevista recollerase información relativa á súa formación, experiencia musical, motivación para participar no programa “Descúbreas”, dispoñibilidade e competencias persoais e profesionais para a música.

As candidatas a participar na primeira edición do programa “Descúbreas” serán seleccionadas por un xurado, nomeado para estes efectos a través dunha resolución presidencial, que estará composto por:

- Presidenta: a xefa do Servizo de Igualdade ou a persoa en quen delegue
- Secretaria: unha técnica do Servizo de Igualdade ou a persoa en quen delegue, sen voz nin voto
- Vogais: dúas representantes do sector musical e dúas persoas pertencentes ao persoal do programa “Descúbreas”

O xurado valorará os méritos, os traballos presentados e a entrevista segundo os seguintes criterios:

- A calidade musical do traballo presentado no vídeo (de 0 a 20 puntos)
- As competencias persoais e profesionais para a formación e a interpretación musical (de 0 a 20 puntos)
- A experiencia musical (de 0 a 15 puntos)
- A formación musical (de 0 a 15 puntos)
- O nivel de autonomía interpretativa (de 0 a 15 puntos)

- As razóns para participar no programa recollidas na carta de motivación (de 0 a 15 puntos)

O xurado poderá contar coa presenza e coa asistencia de persoas expertas nas diferentes áreas e solicitar a información adicional que considere oportuna para a súa resolución.

O ditame do xurado será inapelable.

A Deputación de Pontevedra poderá solicitar os datos, os documentos e as aclaracións que considere relevantes para valorar mellor o expediente, e poderá comprobar a súa veracidade.

As persoas que integren o xurado percibirán as indemnizacións correspondentes ás axudas de custo e aos desprazamentos pola asistencia ás xuntanzas nas que se redacte acta. Estes gastos imputaranse con cargo á aplicación orzamentaria 21/250.2315.226.99.

Décimo primeira. Instrución e resolución do procedemento

A instrución do procedemento corresponderalle á xefa do Servizo de Igualdade.

A concesión aprobara o órgano competente, previa fiscalización de Intervención.

A resolución publicarase no BOPPO, de conformidade co establecido no artigo 45 da LPACAP. Así mesmo, tamén se publicará en www.depo.gal. En ambas as publicacións figurará o réxime de recursos correspondente.

Décimo segunda. Obrigas das seleccionadas

As seleccionadas estarán obrigadas a:

- a) Participar en todas as actividades de formación e mentoría e nos actos de presentación e divulgación do programa “Descúbreas”
- b) Desenvolver con aproveitamento as sesións de asesoramento, cumprir o calendario de actividades e participar de maneira activa no programa intensivo

c) Comunicarlle á Deputación de Pontevedra calquera incidencia que poida afectar de xeito significativo o desenvolvemento do proxecto ou da actuación

O incumprimento das obrigas citadas nesta base dará lugar á perda da condición de beneficiaria desta convocatoria da primeira edición do programa “Descúbreas”.

Décimo terceira. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento dos datos baséase no cumprimento dunha tarefa en interese público ou no exercicio de poderes públicos segundo as normas de rango legal recollidas no apartado “normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercer outros dereitos ou revogar o seu consentimento segundo o previsto en <https://depo.gal/proteccion-de-datos/exercicio-de-dereitos>.

Décimo cuarta. Propiedade intelectual do traballo musical

Todas as persoas que concorran a esta convocatoria recoñecen o seu dominio do título e a lexitimación suficiente sobre as pezas musicais, e manifestan non infrinxir ningún dereito de propiedade intelectual ou calquera outro dereito que poida ostentar calquera terceira persoa en España ou no estranxeiro sobre os contidos; eximirase a Deputación de Pontevedra de calquera responsabilidade relativa ao uso das citadas pezas.

En todo caso, as persoas participantes asumen, baixo a súa exclusiva responsabilidade, as consecuencias dos danos e perdas derivadas do uso das pezas musicais, así como a súa reprodución, difusión ou distribución. Deste xeito, a Deputación de Pontevedra non se responsabilizará no caso de que a idea ou o proxecto musical que se propón ou calquera dos documentos presentados polas participantes vulnerasen dalgún modo os dereitos de terceiras persoas en materia de propiedade intelectual, industrial ou de calquera outra índole.

A Deputación de Pontevedra poderá publicar, difundir e promocionar os traballos resultantes desta convocatoria, e sempre fará constar a súa autoría. A concesión da bolsa non implica a perda da propiedade intelectual nin da industrial. A participación na convocatoria suporá a cesión dos dereitos para os efectos do anterior.

Así mesmo, na institución provincial depositarase un exemplar de cada traballo.

Décimo quinta. Autorización para a difusión de imaxes

No formulario de solicitude as persoas solicitantes poderán autorizar ou denegar expresamente a toma de imaxes nas actividades do programa "Descúbreas", que poderán ser obxecto de publicación por parte da Deputación de Pontevedra.

A participación na convocatoria implica a aceptación destas bases.

Décimo sexta. Réxime xurídico

A convocatoria rexerase polas seguintes disposicións:

- Lei 38/2003, de 17 de novembro, xeral de subvencións (LXS)
- Regulamento da Lei 38/2003, de 17 de novembro, xeral de subvencións
- Real decreto 887/2006, de 21 de xullo
- Lei 9/2007, de 13 de xuño, de subvencións de Galicia (LSG)
- Ordenanza xeral de subvencións da Deputación de Pontevedra (OXSDEPO)
- Bases de execución do Orzamento xeral da Deputación de Pontevedra para o exercicio 2021

- Demais lexislación aplicable